

夏
峯
先
生
集

夏峯先生集卷之九

容城孫奇逢啟泰著

大梁書院重刊

誌銘

督師閣部太傅孫文正公墓誌銘

從古英雄豪傑以得時遇主功成身退爲顯名爲厚實
爲承天之眷而阨塞艱苦俾以重任而多方掣肘使不
得盡其才且危其身此其心更苦而天之所以成之者
乃別有在天生武侯於漢末所志未遂鞠躬盡瘁死而
後已人謂天之阨武侯予謂天之通武侯使之重於天

下萬世也請以擬孫公按公諱承宗字釋繩別號愷陽
其先河南湯陰人高祖遇永樂間來高陽遇生懷懷生
達達生麒是爲公父母張氏生子四叔子敬宗仕兵部
職方司員外郎公其季也六歲屬對語便驚人十六補
博士弟子員文宗署其牘曰古誼敦靈如龜鑑忠肝堅
信若鐵石明年以第一人食餽三十一歲選貢甲午舉
於鄉爲舉子時仗劍遊塞下周歷亭障阨塞訪問故將
老兵遂通知邊事已亥讀書雲中撫署兵譁圍撫軍鼓
聲如雷公教令吏書榜示曰向某道領餉譁者斬人服

其膽略甲辰以一甲第二除翰林院編修甲寅陞右春坊右中允是年東事起襲撫順清河大兵四路進討王師敗績朝議倚舊遼撫熊廷弼足以辦此公曰未也當大事須置身事外乃能洞悉情勢今身爲遼事所圍會暇及藩籬外乎舉朝皆視歸乎公庚申陞左春坊左庶子兼翰林院侍讀充日講官東事急兵尙崔景榮數爲言官所詢詈請罷景榮以公代要公於會極門相率下拜公力辭竟推兵部添設侍郎以主東事壬戌廣甯不守王化貞走熊廷弼焚棄右屯以西四百里躡化貞後

相將入關乃拜公兵部尙書兼東閣大學士公上目前切要及積習夙病數十事請置熊王於法兵侍王在晉代熊廷弼經畧遼東請築重關於山海關外八里舖費一百二十萬公請首揆葉向高曰某當親往一察情形公至與在晉往復商榷曰皇上倚豪傑爲萬里長城安得以百萬金錢輕擲於無用之版築本兵王象乾以百二萬撫西兵於關城下公亦駁之關門議防守未決閭鳴泰主覺華袁崇煥主甯遠在晉堅持主守中前公登中前城遙見甯前形勢天設重關以護神京覺華島孤

峙海中與甯遠如左右掖可扼敵之用水且得展我之
用水遂決計定守焉且驅西兵於二百里外漸遠於關
城公歸以關門形勢諸當行罷事宜入告上欲易在晉
而未得代之者公亦難其人遂自請督師辟職方主事
鹿善繼以行到卽定兵制修營房教火器處分逃將以
新闔鎮耳目禁絕饋遺宴會省參謁使專一公事如有
所欲言則非時叩門弗居常格令趙率教守前屯關外
出守始此以馬世龍佩平遼將軍印行授鉞之禮前屯
旣復撥馬烽火直抵甯遠立六館招天下豪傑上遣中

官齎白金蟒衣賚公出內帑十萬犒將士公執奏中使
關涉兵政自古有戒上溫旨報公是時逆奄方用事創
內操所遣皆中官提督已寓觀軍容使之意故公抗章
逆折之遣魯之甲出守中後所王楹出守中右所皆出
上所賚蟒紵白金甲馬弓矢親酬而餞之檄祖大壽移
覺華自八里舖至甯遠收復已二百七十里以袁崇煥
與中軍滿桂經營甯遠造車兵營爲恢全遼之計公語
世龍等曰守與恢復終是一事但靜則爲守動則爲恢
復予言守者也予懼不能守者也今日守關門必不能

不堅守前屯守前屯必不可不堅守甯遠守甯遠更易
於守前屯有覺華可倚連山可扼諸山可伏目前緊要
惟有訓練精明賞罰當可而已夫兵以簡汰而精亦訓
練之一事也公當闕久外警漸息朝議遂起謂公用關
撫薊撫暨大將爲不得人公力請去不允後上疏云如
欲臣竟致其事則令臣姑還闕下以聯絡邊情比於識
道之老馬上必不欲臣離關請不推經畧不推總督惟
以臣一人督兩撫邊事不治則治臣之罪奏入台省爭
言總督不可罷推吳用先朝議則明尼公矣公銳意有

爲恐事從中阻因西巡薊昌閱喜峰古北諸口取道都門入賀萬壽節面奏進兵機宜南樂急告逆奄樞輔擁兵數萬來清君側奄悸甚繞御牀而哭上趨內閣擬諭曰無旨擅離信地非祖宗法度所宥公已抵通接諭卽刻東行閉門求去南樂嗾其黨崔呈秀等首疏頌魏璫而劾公科臣郭興治和之遂下九卿雜議公自此不得有爲雖留而實困也及公告歸或曰非殺敵不可歸公曰殺敵不難也只中朝不肯耳謝事之後逆奄復使其黨梁夢環磨泊督府文書錢物毛舉髮櫛一無所得而

止公當關四年復九大城四十五堡招練精兵十一萬
進軍四百里敵退七百里招集遼人四十餘萬遼兵三
萬兩年屯田五千頃經費財一百三十餘萬取諸罷兩
尙書築城撫賞之費百八十萬而有餘也公嚴於持已
恕於御物激勸忠義鼓舞豪傑權使貪詐籠挫宿猾至
誠惻怛而機牙四應公旣歸里袁崇煥滿桂甯遠之捷
一一皆公所布署己巳之變公朝受詔夕引道上召見
平臺細詢方畧初擬公守京城夜半旨出令守邊二十
四騎出東便門茅元儀與俱時有以款爲言者公曰僕

受命爲剿不受命爲撫急簡騎兵三千遣遊擊尤岱將之馳赴都城敵退入南海子老營謀知爲公所遣咸昨指焉上命滿桂爲武經畧總理援兵出馬世龍於獄賜之金覲公下教兩帥要如兄弟共成大功忽有遼兵東潰之變袁崇煥下詔獄祖大壽感其私恩與其中軍何可綱等率所部五千人東奔公密奏曰大壽危疑旣甚又不肯受滿桂節制一軍驚駭激而東潰非諸將卒盡欲叛也當慰諭將領解散士卒大開生路以收衆心遼將大半爲世龍部曲臣謹遵便宜行事之旨密劄諭大

壽教以急上疏自剖束兵殺敵以報洪蕩之恩以贖督
師之罪仍許代爲別白大壽得諭大哭諸將亦哭具如
公指還報公急遣世龍報命發步騎兵一萬五千令督
以入援而京師解嚴上遂命公移鎮關門大壽等整兵
入關當是時敵據四城其勁在永其次在遵而以灤遷
爲羽翼公議先趨灤州四日而四城皆下公度敵人瀕
去必一犯遵以示強遣孟道等馳往錦州備之我兵未
解甲果與敵遇復大捷計公督兵戰守七閱月復諸邊
堡四十有奇先後上首級九千餘顆露布奏聞上親告

廟布告中外加公太傅蔭一子錦衣世襲未幾言官欲
追論大壽東潰之事公密奏曰敵纔出口遽抹殺殊死
血戰之功何以服諸將之心乎自是而中朝之議又紛
矣公十一疏乞休上命閣臣議去留皆不敢堅決上曰
吾固知無可代承宗者特遣內閣中書宣諭視事公奏
謝曰臣於某日視事食少事煩卽不能久而輿疾致討
當可爲法遂出關抵松錦逐城爲飾備條次東西邊政
分八疏入奏陵城失守閣部中軍副總兵何可綱以文
自祭死之夫失一陵城而得一節義士撐拄世維見公

能得人之死力然以成敗論人者則百計中公矣公以十七疏求罷得閒住公之初督師也臨遣隆重付以兵要雖宵小竊枋譏間百出猶得以恩禮進退隱然係官府之重其再出也受命艱危之際夜半出片紙單車橫穿敵壘奏汎掃之績是役也危莫危於東便門之一出急莫急於東師之一潰其所以危而獲安急而旋定者謂非天不可謂非人不可公賜閒里居時流賊數十萬曾未一大創而強欲勸之就撫公謂當以有名兵將莫用督撫節制日尋賊廝殺賊急求活乃可乘機爲撫撫

須另一等人專主撫事不得借言勦妨其撫蓋公心一日不忘安攘云戊寅敵復南下公部署子姓分雉堞距守而不餉之兵不甌之城不聯之衆心不能張空拳以禦強敵城破衆扶至城南三里圈頭橋老營勸之降公罵不絕口欲求速死兵不忍殺公乃自理繩命兩兵加勒而死是爲戊寅冬十一月十日距其生得年七十有六公配王生七子長子銓以選貢任高苑知縣銓子之澐錦衣衛指揮僉事皆守官不與難三子鈐先公歿從公死義者次子舉人鈐四子廩生銓五子尙寶司丞鏞

六子官生飾七子生員鎬鈐子之沆之滂鈐子之潏鎬
子之浩鎬子之濫皆力戰罵敵以死其餘從子孫暨婦
女童穉爭先就義者二十餘人公善知人雖悍璫騎將
莫不解頤俯首然公才大而不能不露才時作快意語
故人多忌之公雖不善爲人知然海內賢豪如馮從吾
周汝登鍾羽正於公初請行邊之日特爲勗勉高攀龍
左光斗輩嘗特薦於朝又何敢爲不知者詬厲也武侯
伐魏中外協心黃皓尙未敢伸喙然祁山六出不能得
魏之尺寸而五丈原告殞蓋天之所興人不得而廢之

徒以鞠躬盡瘁一念血誠昭揭於天下萬世公之所值其敵人之強衆口之讒有難於武侯者而鞠躬盡瘁不減於武侯天正以阨公於一時者通公於天下萬世也公有文集一百卷奏議三十卷兵火之後茅元儀得之積垣敗屋中南樞范景文刻而傳之別有督師全書一百卷督師事宜十八卷車營百八扣一卷歷官舊紀四卷撫夷志十卷高陽縣志十四卷前督師紀畧十六卷後督師紀畧十卷定興鹿善繼所輯公子孫姻譜旣沒者不能詳述其見存者銓子之藻之滿之潯銓子之汴

飾子之豐滂子六樞枕性梢枕林灤子二相椿滄子一
楷汴子二枏枕桂子二爾煇爾煇公沒二十四年矣志
墓之文未有所屬仲孫之灤以予知公深必欲俾予撰
次以傳信予固不敢辭且感公序予家乘之言曰尹吉
甫佐周宣中興歸而飲御乃在張仲孝友噫味斯言也
又何忍辭文正之謚甲申御史王孫蕃請也七十八歲
病骨稍蘇子辛丑人日捉筆逾元宵稿成是爲銘

銘曰於惟閣部一代偉人頭頭第一廣大無隣文志亶
亶靡堅弗摧億萬斯言和者其誰兩次當關敵弗敢入

危而復安仆而復立元臣殉義視死如歸二十餘口形
慘音徽總由知學見道分明毀譽不搖得失不驚予也
腐儒公實攜之張仲孝友有感于詩功垂今古德配地
天千百年後雲旋月娟當與公之子孫世世共守斯阡

陝西參政宏若都公墓誌銘

都公諱任字季樂號宏若先世自晉徙大梁爲祥符縣
人祖文奎甲辰進士鎮江府知府父維新甲子舉人大
同府通判公以萬厯癸丑進士授南京兵部武庫司主
事遷本部郎中出爲太原府知府遷本省按察副使以

不阿上官去林居一年起江西南瑞道遷井陘道歷陝
西按察使右布政使郵符事不協新例鐫級壬申補山
東督糧道遷本省按察使失直指意坐計典罷職甲戌
起陝西神木道公具疏自陳屢經計出之由力辭不許
遷山西按察使復守正不阿失直指意罷職林居者四
年當是時逆閹李自成鯨奔豕突秦晉間攻破諸州縣
朝議擇素有才望者急補邊缺至是復有神木之命未
幾寇焰愈熾延綏巡撫某以榆林重鎮特疏調公癸未
補榆林道參政未數月賊陷西安全秦郡衛皆風靡獨

榆林不下賊發牌約降公公碎其牌斬來使當是時撫
軍總鎮皆託故去公獨與署鎮某厲器械嚴飭捍禦爲
死守未幾賊勢益眾城旦暮且下署鎮知不守乃夜脫
身率數十騎護妻子亡榆林世將家固多壯士公乃盡
出囊橐所有享壯士慷慨登堦誓與城存亡眾皆感激
泣下憤裂向義奉公約束憑城殺賊萬餘級賊益憤急
攻城城破公率壯士巷戰連日夜復殺賊數千級巷血
爲渠壯士多戰死公被執賊猶以禮遇公公罵益烈遂
被害蓋癸未十一月廿八日也拒城者七日賊皆義之

其司武庫時承平日久兵器久歸蘭錡好事者動公曰
若借稽察爲名則獲資無算公曰當聖明耀德之時不
宜多事武庫顧客勿言客慚退在太原稅糧規例州縣
解如府收支一出太守歲贏資嘗數萬會前守有故暫
議郡丞代收公至則借此具詳各院稅糧收支專責郡
丞爲定例太原固多屬邑一時皆震懼砥礪晉富民橫
恣蹂躪里閭間吏縱不問公皆羅置法豪強因是屏息
又創誠正書院以造就多士故公守晉三年而文教之
興爲蒸蒸焉官晉臬時方申頌藩國規儀先是晉藩權

閹某煽橫至是輒欲假名目箝制監司守令時監司官多屈曲與往來公獨否閹方憲之會規儀朔望監司官當入朝王藩閹約公往朝公不往藩閹皆難之或勸公曰閹且以違朝廷制搆公奈何公曰按察司者正以執朝廷法明肅綱紀東府有謫不法事司且得問故不令與都布二司同朝祖宗之制也揭會典示之卒不往閹竟憚公無所搆巡按御史某搆學使袁公同官不敢一顧公獨時時與周旋袁赴都鞠貧無資公悉囊中裝得三百金遺之不以告人卒以此怒御史公性廉直而尤

長于政事所至梳垢爬搔民獲蘇息然恥爲徑竇終身
不苟阿權貴人故通籍三十年而官不至於陪卿慷慨
殉義視死如歸嗚呼亦烈矣李淑人賢明知大義以勤
儉佐公三十年子元祺選貢孫甫順治戊戌進士公之
殉難榆林也元祺倉卒護喪歸避難河朔遂權厝陽武
縣今淑人卒于舍卜新阡于會城之南柳林將以月日
啟公柩合葬焉甫奉父命持太原傅山爲公傳以幽宮
之石請銘于予嗟乎未申間逆闖亂秦晉榆林甯武堅
守捍賊以義死者得二人焉公與甯武周遇吉予固知

公真賢者也嘗錄其榆林死事始末入甲申大難錄已
復論次公前後立朝大節入中州人物考今其葬也非
予誰銘

銘曰天挺篤生疆場用憂成仁止義孰怨以尤予銘幽
室用俟千秋

河南左布政如星梁公墓誌銘

公余六十年老友也出處離合局各不同而吾兩人相
視則無不同也自余去蘇門公家居已久頻寄書慰問
後目不能書猶口授令其孫書之嗣聞公訃寄三詩哭

公今余歸而公之墓木拱矣公之孫鉉曾孫永淳以所
自叙年譜請志墓之文余耄而艱于思然念公老友獨
余在未敢以不文辭按譜公先世小興州人洪武初徙
大姓實內地卜居容城之小里村始祖澤入贅城東李
氏遂家焉澤生鐸分派白塔村生文玉文玉生詩詩生
景先是爲公父由廩生選授訓導公生有慧質人稱神
童十一歲能文十五歲見知于縣令江左彥曰容城科
目必此子矣十六歲入邑庠方令義壯鑒賞更倍于江
因家貧不能讀就外家北城趙氏居焉戊戌選貢癸卯

登賢書癸丑登進士甲寅授鄆城知縣剔釐興除多有
善政乙卯山東歲饑殺人劫冢公搜倉請賑及勸助約
得穀萬石煮粥食貧者緩征以俟民無流移丙辰內艱
歸鄆人爲建祠勒碑官囊蕭瑟至不能營葬事服闋補
陽信值雨紳搆訟虛詞四五十紙各懲其家人健訟者
一併歸結以一小戒而寓大懲事賢友仁陽信皆德之
己未丁外艱壬戌補河南光山縣時山東寇變驛遞改
由光山界鄰楚黃隰聚滿山谷一日警報數至公率家
僮星馳抵任卽議修繕嚴保甲潔已愛人與民休息凡

一切令行禁止人之德公皆如治鄆與陽信焉甲子鄉
試分較得士稱盛乙丑以治行徵授廣西道御史巡視
城工時魏忠賢用事疏入多不當旨丙寅差查刷光祿
寺一年例當滿屢差監禮太廟社稷壇天壇皇陵以覃
恩加級中議大夫冬月巡視東城戊辰告病回籍修家
祠立神主爲父建鄉賢坊于家廟之前又修集賢亭於
天甯寺後爲諸士讀書會文之地辛未病愈補江西道
御史尋差巡按貴州值土司安氏初平水西爭地諸苗
觀望日報苗變與撫臣朱燮元寬嚴相濟完數十年未

了之欽件清數十處不結之盜獄興鄉約保甲以化民
備兵餉要塞以固圉重葺陽明祠以興學自此西南半
壁始知漢家威儀矣癸酉監視鄉閭嚴革從前通同之
弊離省至平溪氣血俱枯上疏病辭不允甲戌回道卽
有撫賑陝西之差原發銀六萬義助銀八千面授手給
飢民得沾實惠活者不啻十萬人乙亥陞潞安道參政
時知府某好剛使氣與王府相爭縱兵挾官錢糧專擅
公與撫軍定經制而兵始無譁丁丑陞山西按察使邊
防河防報無虛日公宿城頭禦暴與諸道府縣共之戊

寅轉河南右布政管守道事未幾陞左布政流賊愈熾糧餉不敷前官布政司脫欠二百餘萬俱責見任催補公爲人受過罰俸至十五級壬午賊圍汴公守東南長五里餘四百餘槩賊遊卒攻甚力公率家丁銃箭擊之得捷賊既散去九月尅歸德十月復來攻汴公與譚都司死力禦之賊遍掘城塹四面圍布月餘兵民餓死強半殺人相食賊復乘勢力攻土人爭決河灌賊河決衝城南北門人死無算周藩與各官皆避去公避于封邱又避于延津會巡方御史蘇某賑饑御史黃某薦公三

次守城功年雖老宜優以京卿銜賞銀三十兩公亦具
疏老難入覲始得歸里明年癸未又明年甲申皆在里
門而公之譜止此矣自甲申七十三歲距捐館之年庚
子逾歲十有六意若曰無庸譜也亦無可譜也良工心
獨苦矣公生平孤行一意不黨同小人并不比臆君子
其與鄉人處多親近貧士而疎遠豪富其居官也不欲
著赫赫之績而常與民休息蒞官四十年田不過數頃
宅第一區樸儉無華喜飲酒所召無不赴客至卽留然
觴豆取屬饜而已不漸爲腴靡澹素其天性也好鼓舞

後進嘗買書送寶藏社中又每爲同社佐酒跡其行事
益多古人之行云享年八十九子二可培恩選貢生歷
官衡州府同知可埴癸酉舉人孫七銓鉉鑑錠鍊鏘鏡
曾孫五永淳永溥永治永濟永潔元孫一楹余旣志公
生平復爲之銘

銘曰九十春秋譜者七十廿載沉浮非云莫及花滿河
陽栢臺鳳集黔海風清秦關沛霽大河瀾頽孤撐血泣
流傳賜金悠悠都邑禿筆銘公庶不失六十年之服習

鳳翔知府貴一王公暨配于宜人合葬墓誌銘

憶余甲辰入郡借居東寺禪林正公下帷處也公執榼承飲而過余握手吐肝膽悲歌笑語飲盡驩至中夜始罷嗣是余連執親喪閉戶不聞外事公後亦入宦途兩人蹤跡濶如也癸酉夏公仲子爾祺來謁徵余銘余辭之不獲謹按狀而志之公諱默字浴淨號貴一先世小興州人後遷清苑之石橋村大父土父鍾華以耕讀起家多隱德生子三公其仲也平生慷慨磊落雖治經生業非其好也而獨有志於經世萬歷癸卯舉於鄉四阨春官遂棄去曰奈何以八股了一生哉凡可因分自致

聊以行吾志丙辰謁選得東昌府高唐州三年丁繼母
艱天啟壬戌復除陝西隴州期年陞鞏昌府靖鹵衛同
知歷五年崇禎乙丑行取戶部山西司員外三年出
守陝西鳳翔以病歸蓋公素負遠略隨其所至皆能發
舒其志氣而大用未竟識者悲之其任高唐值旱蝗民
多逃散公爲給牛種且措置義田至捐俸以從事復業
者接踵舊有積穀旣以荒給民荒未除而責償催檄日
至公繪流民圖以請得蠲四千餘石衙役代耕取給於
門難房號至有破壁半室而按額征之公別爲處風額

盡革至於潔郡之賦四倍他邑公具不均之狀力請於
當事改而均之潔民百世永賴也公在閭閻盡知情僞
嘗謂快如虎壯如狼皂如犬一朝革去三十餘人民則
事無小大皆得面訴故胥吏有甯受百姓氣莫使堂上
聞之謫其任靖鹵遠處西城隔敵一河軍餉恒苦不繼
公五年在事治兵之勞勞於治民而軍無敢脫巾敵無
敢牧馬邊人相慶邊地之安安於內地也及入佐司農
人方謂京秩優游可酬前此治兵治民之勞而東變猝
薄都城公董行糧於東便門不解衣不櫛髮者數月事

竣紀錄晉階郎中主爵者識公可任盤錯遂以公守鳳
翔公手書府門不爲民造福只爲民除害不爲民除害
只不爲民害有識之者曰是嘗守高唐爲東郡第一者
言前之信下令如流水免商稅除衙蠹修城堡清額解
字下衆指治狀赫然是時流寇猖獗赤白之丸在在見
告公爲防禦躬履行陳一犯隴山再犯寶雞皆大創之
巡方御史吳甦推爲郡伯第一期以大受而公以勞瘁
乞骸骨歸嘗聞士各有志志之所至氣卽次焉公故有
志於經世歷官內外皆在兵與民之間其作用皆在吏

與將之間而皆能行其所志微獨靖鹵鳳翔皆以兵事
顯卽入民曹亦適值兵變而爲三軍供朝餐豈天不能
越數而預置公以待應耶猶憶余友鹿伯順爲述范夢
章十五年前語劉大將軍綖赴遼道經東省人畏其擾
閉戶拒之無從得食譁之於官官復避匿每至紛紜獨
至高唐而民爲兵主吏爲將主勞且犒也因擊節稱王
高唐真邊才則公之將略固自高唐已見之漢時長吏
卽爲良將公固其人歟公爲諸生時號浴淨一日夢至
一神前衣紫束金題云貴一神位側立者稱卽汝之值

遂號貴一而字浴淨屬纊前七日見有持貴一神位而
迎者且請以期若旁有人相揖讓而逝亦異矣元配于
宜人生而寡言笑動以禮自繩公宦遊未嘗一抵任所
躬井曰勤績紡忘其富矣事舅姑執饋惟謹讓妯娌撫
卑幼桑中無錙銖之蓄嘗集小兒語以訓其子婦病且
篤不欲醫診脉曰婦人手安可予人且死生命也臨訣
屬其子善事庶母治喪勿厚當視吾生前所享者其睹
於大義如此余固不嫻古文辭而諸子堅以相委獨爲
余素不能作溢語然不溢得無減歟減之失實甚於溢

而無奈相委者之不可辭三十年前執榼承飲夜半始
罷之景復戚戚目前因爲志而系以銘

銘曰羨公爲政如烹鮮羨公治兵如弄丸皎皎身名已
兩全賊未滅兮心猶丹爲望關南之花園綠蘿樹旁其
岡鬱盤其草芊眠願公夫婦之靈爽恬焉遊焉偕樂於
斯阡

兵馬司西星崔公墓誌銘

予以康熙甲辰自共城歸掃先塋兒童老大戚友凋零
不能不令人重今昔之感因憶公歿二十餘年懷念芳

規宛如昨日會之瑄兄弟手公狀請銘曰愚昧不能述
先行賴父執以圖不歿予與公三十餘年姻親道誼交
忘形跡年雖耄烏容以不文辭謹按狀公諱庚字貞甫
別號西星原籍小興州移容之沙河則自仲美始美生
恭恭生敏敏生友才友才生欽欽生陽陽生應宜是爲
公父七世業農然饘粥不繼也公負性慧敏八歲時遣
就外傳未幾欲罷塾師張敏忠見而奇之捐贄儀授餐
以勉其學十二應童子試郡伯許公亟賞其文招至署
中與其子肄業數載許歸邢諭范公聞而迎之無何父

母相繼棄世兄弟四人俱幼瞻育爲艱公竭力撫養二十補博士弟子員萬歷壬子以毛詩登京兆鄉試公車屢困出宰淇水有田數十畝盡給諸弟且身任其賦稅焉淇衝當十省郵驛難支居民流徙者十之八九戚友咸爲太息公慨然曰但討得一貧字歸家何地不可爲于是痛除積弊驛傳之事身自任之凡可爲民省一分必力爲請命雖險惡不避也已巳冬勤王兵舉軍糈取之民者勢越倒懸公借支別項遣子之瑄從行間北上就辦於附近者事得完而淇民猶未知也涖任三載諸

廢俱興流徙漸次安集淇郵傳繁苦轉運所需車牛寥
寥不給至是而車馬繁庶不可勝數矣一時政聲隆起
獎薦二十八上未嘗賁一金往謝轉南都司城士民奔
走訴于上官求加銜久任上官心賢之而未能破例也
郡伯苗公稔公卓績採切要者十款勒石以示後去之
日有驛遞節省銀千六百餘兩留邑公用司城年餘江
楊之盜漸次斂跡以潞糧失額謫幕徽州徽財數幕多
以賄聞公嚴砥暮夜每決一案無不得情以故徽郡疑
獄往往待公而理任數月卽視篆太平平俗頑梗泣土

者率望議逮譴缺久懸署者又視爲畏途直指以公隔
屬代庖履任之日六案塵封吏書玩愒幾不知有官公
一私不染夙夜精勤不數日竅郤清積弊斥任事僅兩
閱月歌清操撫字者填閭巷三年陞山西岳陽縣道出
洪水淇父老遮道迎踴躍歡呼以重見父母爲幸遮道
泣留者相繼不絕抵岳陽地經寇盜盤據人民存者十
僅一二川土旣荒解徵仍如原額公申請止照熟地徵
糧耗羨爲之全革于是流亡漸集無何賦歸來岳人繪
像事之贊曰無矯無飾有威有儀亦瑩而秀亦坦而直

亦轟轟而烈烈亦委委而蛇蛇亦湛然而秋月亦藹然
而春颺亦百篇而工於詩吟亦十斗而豪於酒社亦游
刃而周民之隱亦冰清而高吏之潔絡繹二百里外猶
不忍歸公嘗曰地何負于人哉或恐人負地耳歸里杜
門娛情詩酒嘗書一絕于壁云宦遊數載賦歸與行李
蕭然孰信渠惟有中天明月在清光時照飲冰廬范公
景文撫豫時稔公治狀極薦其才能鹿公善繼雅愛其
人魏公大中題其讀書之室曰歲寒居其爲當代大君
子所引重如此公才敏故事到毫無棘手至與人處坦

裏質行無問長幼賢愚皆亮其無他初舉賢書貧交數
以瑣事相干公無厭予曰我縱無愧如人不諒何公曰
幸邀一第忍棄貧交乎當事卽不諒我我猶可見諒於
人耳猶憶亂時予曾以姪量雅兒子望雅相託從於洪
公飲食教誨無異於子弟偶弗率者則又索予家郵督
責之交情真摯豈讓古人乎予移家蘇門每過淇聞父
老歌頌明德嘖嘖如新且公之循蹟載中州通志甚著
嗚呼公可不歿矣子又烏能不歿公乎子四之瑄之瑚
之璉之璠俱庠生孫四鴻序鵬序俱庠生鷺序鳳序曾

孫一微諱子姬庠生量雅卽其子壻也遂爲之誌而銘
銘曰握符洪水誓矢清流司城留都風行大江之嶺岳
陽芻牧春生山右之甌歸帆載月印照雙眸白雲悠悠
伴此高邱

孝廉玉屏孫君墓誌銘

歲甲辰余自蘇門歸掃先塋年益八十有一矣十六年
始一至里門昔日之老友故交零落已盡而齒之遠邈
於余如玉屏者墓門已有宿草今昔之感益愴老懷會
君仲子立勲持明經劉君濯纓所爲狀乞余言銘諸幽

室余曰子知天道乎人知天之所以不測者以其有翁聚發散之用也而不知天之所以不測者發其所爲翁而致其所爲聚也於發也而愈知其爲翁於散也而愈知其爲聚通乎此卽可卜人事焉憶萬歷間通許公介余言爲其尊人稱八十之觴余謂潛德弗耀其後當興嗣通許公以明經作令玉屏君以高才舉孝廉咸謂余言成左券矣余曰未也孫氏之厚積久而益著遠而益彰天道當別有在君復以賁志歿矣按狀君諱爾禎字玉屏系出小興州明初遷漁民實內地始祖百成籍容

城之歸化里孝弟力田世有隱德八傳而至某生子二
長炳次煌由明經爲河南通許令是爲君父母楊忠愍
公從孫女也君生而穎異甫成童補博士弟子員每試
皆前茅君善貧而嗜讀嘗坐枯井中研究義理至忘饑
渴卽衣敝履穿處之恬然而學益力行益修時炳因試
不利成疾君與通許公泣請於文宗願去已廩餼以全
之文宗嘉其意給衣巾授儒官君館新城邑有冤獄君
稔知其情密寓書邑令得釋而其人不知也君長於訓
誨子弟成就者不下三四十人已已避地時通許公司

訓金華之浦江君力不能達過山東借舊令朱我白之
助始成行忽有浙人路被刼君憐之慨許附舟以歸崇
禎癸酉登賢書丙子守容之役君父子兄弟率族黨獨
當其衝城得全容人士利賴焉君固貧士而熱心名義
有不能婚葬者營樂爲助有貧而鬻婦者君質園圃十
金資其完聚甲申後困乏益甚人有勸其爲貧仕者君
絕不動念其所得可知已通許公生養死葬獨竭心力
不以煩諸弟崇重節義嘗率紳士表揚孝婦之廬故君
家婦與女皆以節著余嘗爲之立傳第爾祚亦節士余

於君之父子祖孫而得天道之翕聚發散時發也而時
翕時散也而時聚天之眷顧孫氏蓋未艾乎子二立德
生員蚤卒立勲王子舉人孫男五士瑾士瑰士球士璧
士琮卜於某月某日安厝于西郭之松原遡君之生平
有可誌也

銘曰舉世所苦總之怨貧君獨甘之若將終身窮乏日
甚名義愈親不慕榮祿古之逸民靜修之風庶其不湮
吏部郎中玉笥馬公墓誌銘

安邑玉笥馬先生官吏部歷四司能稱職嗣以母老請

終養歸里辛亥十月卒於家其孤祚錫等乞爲誌墓之
石時余臥病不能勝筆墨念公先督水衛源辱塵外知
且以夏峯田廬爲余子若孫躬耕之地二十年道義殷
切不時寓書商所學今成隔世矣後死者烏可以病困
辭乃吮筆而誌其生平按狀公諱光裕字繩詒號玉筍
里居後顧所居曰止齋學者稱爲止齋先生世爲晉人
有諱世英者由曲沃避兵安邑遂家焉逮公凡十一世
忠厚發祥中鄉試者七成進士者二故邑稱鄉賢世家
必推馬氏云公會大父崇力學殖行及門士五經咸備

祖斯才以春秋傳宰尉氏有遺愛父敬涵公諱之偉誠
信孚里閭積以弗顯公生而岐嶷不凡幼服庭訓卓然
有遠志稍長殫力於學盡讀祖父藏書十七歲補博士
弟子員試輒高等食廩餼文聲蔚起撫軍吳公鹿友督
學袁公臨侯皆器重之乙酉舉於鄉丁亥擢南宮觀政
禮部授工部都水司主事奉使督理衛河衛河無錢穀
獻稅職惟導丹衛淇洹之水達漕濟運公率所屬力勤
疏導凡牘夫河丞諸常例悉罷去刻有衛河圖說源流
疏濬可考也時余來寓蘇門公每單騎過訪或集百泉

三
弔邵許遺蹤暇則舉文會數郡邑士皆執經問業經其
鑑拔多登高第稱知名士會林慮山寇據險自固兵不
能近爲民隱憂公致書總鎮謂宜懾之以威撫之以恩
使知雞犬桑麻各有本務家人父子各有至樂投戈爲
良是亦神武不殺之道也總鎮以書諭寇遂受降一方
獲安人皆服公有用之學壬辰使竣轉文選主事陞考
功員外晉稽勲郎中歷驗封考功凡五遷在選司止三
月惟期以人事君不負國家建官之意至會推大臣侃
侃持正爲公論所服考功日議天下官吏功罪悉平心

以處柱聯有事必告天心惟向日之語稽勲稱閒適驗
封架上藏書甚富公餘手錄刻日鈔三卷再陟功司接
特諭考核督撫矢公矢慎甄別允當時工部咨江西未
完料價應降級官六十二員聽調用公謂工部料價較
戶部大糧僅千百之什一若不通盤總算止據零星未
完分數輒去多官一省若此合天下計之當何如耶料
價一項若此合各部寺錢糧計之又當何如耶日行銓
補恐亦不給且綰符者望於路去位者空其署地方無
任事之官錢糧益增匱絀之嘆於用人行政均未有當

因議暫停降調仍咨回工部轉行該省覆實確查官賴以全者甚衆乙未分校武闈拔于國柱賜狀元及第丙申掌計典不徇私不枉法竭七日夜心力逐人逐事剖析註冊錄手夾誌之人以爲煩及上問降級不同之故公據手夾一夕疏成冢宰中丞咸駭爲神奇有一二被黜者倡言面證公指實以對言者慚退在部兩奉嚴旨倉卒禍叵測公凝神定慮唯以義命自安第光啟以進士司鐸上黨公將母之念益切拜疏陳情予告終養出都公卿賦詩祖餞朝論榮之抵子舍日依母側必得歡

心光啟官戶曹歸公與怡怡膝下德業相勸依然夙夜
共勵之心蓋孝友其天性也公自幼敦倫修行事諸父
如父有姑姊俱孀居家中落公力爲調護撫其子有成
建先祠春秋祭饗必豐必潔曰吾身所享受皆先人貽
澤也宗族有婚喪不能舉者分俸資助之曰皆吾祖父
遺體也里黨中有急必以告告必黽勉應其求戚友相
與一以至誠惻怛相流通安邑學無尊經閣公曰尊經
與明倫並重倫不可不明經卽不可不尊倡義創舉歷
十一年而落成兩廡位次名氏補缺正不紊建育德書院

集邑之才俊月三會崇正學黜浮詞人咸感奮興起至
樂善尤燭性生見人之長卽鼓舞誘掖與人談節義事
肫懇形諸詞色嘗曰人一念悚惕不爲私累便是理欲
分界便是人定勝天公力肩聖道踐履篤實應事接物
有確乎不拔之操廓然大公之度而檢身謙謹常若不
及五十志知非之學凡言動居處務軌於禮邇尤潛修
自反尙友彌殷蔚州魏環極爲公同志余雖老耄承公
學問相訂甚感虛懷聞其抱病三閱月猶力疾日省慈
幃以示無恙一生精力畢凝注於母氏之前念父違養

怡懷風木每遇生辰不受客賀教子進修儒術敦行力
學卒年六十有一所著有止齋集子五祚錫載錫純錫
萬錫九錫孫三謙蘊謙益謙晉今卜壬子春二月二十
日葬於祖塋公之懿行可示後世也因系之銘

銘曰天挺哲人德粹神休克紹令緒丕著嘉猷督澄衛
水卓潔清流歷吏四曹冰鑑橫秋拜疏將母子職聿修
知進知退服道優游潛心性命恣力研求升堂入室進
步竿頭嗚呼先生正氣不泯壽溢陵邱

孝廉居易賀君墓誌銘

余來蘇門聞獲嘉賀公景瞻以林居殉甲申之難里人
稱爲文貞先生心切嚮往之嗣是從子孝廉居易君過
余以傳相委余因得論交暨嗣孫振能振能者君命主
鬯文貞公有家學執世誼甚篤憶甲辰余北上遇君於
黃梁旅舍握手殷然迄余再歸蘇門而君遂作古人矣
日月無多不勝今昔之感君歿振能魁於鄉又十年甲
寅始厝君於祖兆持所自爲狀畧乞誌墓門之石余耄
廢遜不文振能謂質言之尙可徵信於後世也按狀君
諱行素字居易一字希白世爲衛輝之獲嘉人前代多

隱德五世祖雄以典膳起家雄生春春生國清國清長
子大參公盛瑞盛瑞生仲軾是爲文貞公大參公第良
瑞生仲木邑增生以孝友忠恕著里閭間是爲君父生
子四君其長也生而敦敏嗜學天性孺慕至友愛諸弟
衣食甯取其微妻子率安於薄爲文雄健有氣就童子
試郡邑守令所賞拔補博士弟子員自是每試輒高等
幾赴省闈不售益自刻勵立背水社社約有不勵學無
以爲人子之言同人爲之感動庚辰居父喪哀毀骨立
時歲饑人相食君與配劉鸞鸞珥爲母具甘旨自咽藜

藎然未嘗廢學逾年母逝兵火之餘勉襄葬事情文無憾文貞公以武德道家居值鼎革之變將抗義死子敏猷先卒乏血嗣衆議以振能嗣之未及舉忽聞國難文貞公中前議君慷慨受命迄僞官怒掠其家逮捕家人于獄衆懾怖畏禍振能年甫數歲君命卽日主文貞公喪以候弔客或言禍且不測君慨然曰生者尙有辭逝者何可背常人之嗣猶不忍絕忠臣之世何可無繼乎備經險難卒無恙文貞公身後之事遺文手澤皆君任之乙酉當大比士君念家國憂患之後絕意進取族黨

力促之勉赴棘闈乾餒飲水試畢得售君大慟曰恨不
於二親望我之日也君有幼弟莊素爲流寇所掠君憂
傷感泣常爲哭第詩聞者悲之至是偵養晉中急迎歸
復抵晉厚報其人居數年共議析產君曰先世數椽兩
第共避風雨餘無多業僅取田一區樹數株存先人遺
澤而已君時雖舉於鄉家固蕭然邑令欲屬君爲居間
有夫婦相賊鳴之官且權重典以數十金詣君託爲之
地令聞之曰是足療賀子貧矣卽日出之君候事解還
其金曰是豈有人心者所宜受耶甲辰下第歸益搜家

所藏廿一史十三經暨諸子百氏之書羅列几杖寢食
坐臥其中嘗累數日不出乙巳夏避暑城東亦在園偶
感風露急掖入城遂歿月前君忽書於壁曰出生平所
讀書再一披閱與之作別不謂遂成先兆也生平嗜讀
卒用以老自言人當多識古賢豪行事稍知趨向庶不
汨沒流俗然質直性成誠信素孚而遇事有先識每進
忠告於人諄誠務致其聽乃已歿後有郭生以忤邑尉
反噬幾陷於法嘗語人曰賀君而在吾奚罹此其爲人
信孚懷慕類如此文貞公未竟之志君任其勞而積學

未見於世循理不獲永年豈非天耶年五十有七子二
長振世廩生仲卽振能丙午舉人孫一鳴玉庠生所著
有客燕草亦在園集枕上詩數卷藏於家仲子抱恨終
天且以不得盡悽於所生益用悵快余惜君之志嘉仲
子之孝援筆而志其生平復系之銘

銘曰維君之淑身兮外圓而內方維君之蓄德兮體闇
而用彰維文貞之殉節兮振華宗而翼綱常維君之割
情主鬯極力顯揚兮遂與日月而爭光維君之生順沒
甯兮有我銘其幽堂嗚呼告彼後世兮是爲君子之藏

濟甯知州變五李君墓誌銘

歲丁未春正月變五李君以病卒於濟甯官舍越三月其仲子茂才溫皋使來以訃聞且持濟紳宗人府丞王公所爲狀乞誌墓石之女追思姻誼不忍以衰病辭憶甲辰春君以進呈表忠錄被逮緹騎風馳惴惴懼禍且不測乞對部面質靜言正論人不能奪廷臣以是益嘉之而君之偉節益著表忠錄者紀甲中闖逆陷京師諸公殉難之書也其書本余草創君搜訂勒成一編始聞君被逮余急赴部白君之無他乞驅車入燕而君已還

職矣當世方以大受期之忽積勞告殞豈不悲哉按傳
君李姓諱順昌字燮五其先小興州人始祖故明初爲
執金吾永樂間遷入內地占籍新安之三臺里家焉數
傳至勝勝生繼先繼先生鶴齡是爲君曾祖通經守古
步矩先民以明經終爲鄉里所推曾裁其懿行入余取
節錄生子國光有潛德國光生燦是爲公父充邑庠生
積學累行一時門弟子執經問業者趾滿戶外生丈夫
子四世昌會昌明昌皆列庠序君其季也生而奇疑類
異讀書日數行下時國光年九十餘燦侍病躬浣廁脲

君八歲卽能代父滌除便液無倦容同里有完一李君
鹿江村高弟也完一奇君才令從受學坐臥一樓書聲
達四野至夜分不輟其篤志好學畊夫猶能道其伊唔
燈火閤也出應童子試輒三冠軍旋食廩餼大有聲於
庠序研究經史旁搜博覽根極理要且留心當世之務
國初君首膺里選以經明行修充太學丙戌再行鄉試
遂登京兆榜次年下第以母老就鐸肅甯適河間郡丞
缺廉察知君才命視篆參軍務時姜襄倡亂伏莽竊發
君撫良戢暴皆得其宜庚寅還陝西中部令中部處萬

山之巔尙餘流氛遺孽前令皆喪足不至君毅然單車
就道謀知渠魁劉鐵棍最狡悍有眾近萬以計誘其甥
丁仲甫與之攜貳仲甫隨以三千眾就撫督撫稱快謂
有令若中部山後不足憂矣未浹旬而劉果爲仲甫所
擒民是用安辛卯自春至五月不雨君力禱弗應乃厲
聲曰水旱疾疫惟神所司今民罔敢愛牲牷神其弗歆
將奈何與神約三日雨則已不則吾當立死神當立碎
三日內果甘霖如注邑人勒石誌其異邑西北瀕邊陲
民事騎射視賓興爲具文君爲之講學課藝復資其貧

乏是年劉生爾怡登賢書邑稱彬彬矣未幾以母憂服
跽歸里服闋補商南商南經兵燹後邱墟星散君多方
招徠民稍稍復業課農桑視勤惰爲賞罰復以牛種給
其貧者邑苦鹽額戶口減而引如故君力請悉蠲荒區
隨爲樂土暇則訪四皓遺跡表用里故里適以挂誤拂
衣歸掌科劉公連章白其誤復君官戊戌補山西和順
地界黃榆松子四嶺間山高風冷令此者綦難之且地
不宜五穀惟產麻民不解紡績卽鶉衣不備君擇老嫗
之工者分教之日課線二兩月賣布一疋滿城軋軋鳴

皆機上聲也邑賦舊以四季征民貧不能應君申請春
二秋八迄今晉有秋完名色實自和順始和順地隣樂
平額有協濟驛傳銀兩舊例僉富民充役往往破產不
恤君力請撫軍題免邑人德之辛丑冬以上考擢守濟
甯濟當水陸交衝煩劇百倍人以三任僻邑忽當衝郡
咸爲棘手焉君至首嚴里甲猾胥積弊鈎校簿書嚴核
隱漏發奸摘伏人皆懾服有以兩造至者片言輸服而
去於大惡巨憝必寘之法有可矜者則不憚反覆詳讞
以求生命若捕逃一事人皆取盈以博陞遷遂不暇計

真偽君嚴株連懲脅嚇一時皆屏跡不敢逞濟河挑瘡
椿柳暨上下緯挽雖隣邑協助而濟之民力不貲言爲
民請命得邀寬豁因少駐而漕運亦不病督漕使者交
章薦其有經濟才甲辰適以進呈表忠錄被逮事白復
赴職益礪初心丙午忽患痰症猶力疾視事凡八閱月
竟不起嗚呼跡公生平可謂先勞無倦矣王公狀君有
曰宏才肆應張弛咸宜處僻邑不多一事處衝郡不遺
一事但聞其賦稅不督而完獄訟不煩而判兵馬往來
冠蓋絡繹一以暇豫處之遇有繁難無不咄嗟立辦此

非知公之深者耶君爲人軒舉英毅貽模勤儉教子知
勞雖久歷宦邸而布衣蔬食類寒士在肅甯時余兒子
輩見一褐百結而君之吟咏自若惜乎年僅逾中壽秩
僅列刺史豈非天之厚君別有在乎子三淑皋溫皋湜
皋孫二標模溫皋子姪度雅子婿也將以某月日葬君
於三臺祖塋之阡余旣志君生平復系之銘

銘曰旣豐其資胡靳其施鬼憎其命吾悲其時三令山
城一守沛水植於其身徵於其子三臺之陽木鬱土良
我銘片石維子之藏

汀州府同知趙君墓誌銘

趙氏爲開平望族青城公同子庚子京兆榜鹿忠節佐
孫文正公督師渝關子因二公始得交青城裕經世之
志雖未竟其用已隱然爲一方干城又三十年子旅河
朔公之從孫御衆來從遊得詳聞其家世出友人王壘
爲其父恬如君狀以志墓之文相屬予與君家年誼世
好且御衆有志於學子雖耄忍以不文辭趙之先爲金
陵人明初遷開平衡世居灤州六傳至廷揚廷揚生濬
隴西丞曾視邑篆卻庫羨三千金濟水旱軍興院請于

朝子養正舉萬歷乙酉鄉試次養蔚卽青城歷官尚寶
寺卿次養冲字赤霞官浙江甯波府通判以清直著聲
望書旌異是爲君父君諱申寵字恬如性孝友問黨皆
信之有幹濟才隨所在職掌有所建立雖卒然臨之而
能出險應變真有用人也爲諸生時母孫卽世繼母劉
少慈愛嘗以微罪鞭笞之雖隆冬單衣跪而受杖未嘗
有怨色當失怙後諸弟議析產君唯諸弟是擇事繼母
較父生時倍謹一日弟峙及申榮以爭宅構訟君詣官
曰兩弟傷和長兄之罪也願以寵市宅直千金讓幼弟

峙都司理耿某嘆服久之表其門曰有伯夷風後君官
莊浪繼母在里病革呼其生子鉅茹泣告曰汝兄眞孝
子也癸未以廩生入太學授山東布政司理問甲申逆
闖之變君正視陽信篆逆闖選僞命至君集百姓之義
勇者擒而殺之定鼎後間道走京師上其狀卽以君實
陽信令馳騎往赴復擒僞都司孫邦奇斬之四境遂安
旣而以運餉功陞陝西莊浪衛同知茶馬御史蘇某以
前營事誣奏君革職未行忽米回擁眾作亂河西數處
皆失守寇莊浪強君官不從以嚴刑逼之終不屈乃幽

於別室總督孟率兵至賊衆始西遁復約其部圖再來
屠城君乃矯爲總督檄遣人招西番七十二堡聯絡以
禦敵賊偵知有備竟不復犯事平總督首君功詔復原
官改浙江湖州府同知甫任卽視篆歸安適漕糧催檄
如火數十日間運糧十二萬石有奇以過淮遲期爲漕
撫所劾逮至京司寇廉得其情知遲期在前官應無罪
復補福建汀州府同知未及行突以偶疾而逝得年七
十有三嗚呼君爲廉吏之後家庭孝友洵足風世以其
居讓第猶爲人所難而宦跡浮沈未得展其懷抱亦可

傷也子三御衆和衆淑衆孫一冠樂庚子柩歸自浙已
寄葬於鄆陵縣伏村之東原因御衆適客鄆其友梁廷
援爲卜之地子旣志之復以銘也

銘曰君生開平之右族而死也胡去其鄉君抱用世之
偉略而官也胡困遐方抑時勢之莫知而吾道之多傷
嗚乎是唯恬如之藏祝爾子孫之昌

藍田知縣乾行楊君墓誌銘

乾行之卒也爲順治己亥八月得年四十有五子聞而
悲之蓋傷其志之不遇也夫乾行負雋才登進士令嚴

邑惠政在地方奚以言不遇非其志之所存也其志之所存渠固不得告諸人人亦孰從而知之人不知其志之所存遂謂登進士足矣令巖邑足矣而乾行之所缺焉不足而奮勵策勉於後者志方銳氣方猛而天忽奪之使不得竟其成此予所以傷之也君名行健字乾行十九歲補博士弟子員二十五歲登崇禎乙卯鄉試才智精彊有心計當國事多艱常思與海內雄駿君子搢擢胃腎以自効于國家甲申大難隱痛不欲生與友人介赤山期走金陵念二親衰病無依不果時予亦避地

渥城朝夕過從君師我我友君凡米鹽瑣碎靡不相同
家人婦子之詢諄靡不可相告語也予聯十老會令諸
家子弟行酒存養老之誼君父懷秋公與焉懷秋公多
病君侍杖色養無情容丙戌丁亥兩赴春闈輒傾硯墨
汚其卷不終場事而歸己丑懷秋公謂予曰吾兒兩不
終場其意可知然如二人老病何借先生一言相勉予
因謂乾行曰尹彥明以僞學之禁不對策而出正叔云
彥明有老母在君今日得無類是父子非立名之地拂
親心而談高蹈恐已心亦不慊也君遂於是年登進士

授陝西藍田令藍田當秦險要大盜盤據四十餘年五
經殘破君爲恤其徭賦居民漸集然後料理城守風聲
遠播賊相戒不敢犯境有於賊中獲綾一幅內書居民
姓名若干上官數令究其事君再三力請曰此輩驅而
入盜情已可矜若皆加以死不獨傷百千人性命且令
反側者不安不如火其跡則彼自化爲良民矣衆感而
痛哭曰公實生我治藍田多善政濬水灌田民獲其利
清冊丈地吏絕其奸旱不爲災虎不爲害旌節婦禮隱
逸循良之績難以枚舉獨坦衷孤意不能媚事上官無

何被劾解任羈滯三載囊空如洗薪水之需皆友人與士民供給焉事白秦臬張公留爲昭雪再圖補官君歸養志切兼程抵舍懷秋公遂臥病未幾不起君奔走營葬事備匄過蘇門乞志墓之墓比歸里未幾母氏亦告逝憂瘁百罹遂嬰痰疾諸醫不效君泣然流涕曰大事未舉何死焉因卜日襄葬事跪伏小車上以送之哀毀之極痰證大作竟致隕命噫君之情亦苦矣憶昔年君過蘇門慨然相告曰年逾不惑而迷驚益甚志未得遂未免降志身不能守未免辱身不知此後尙可伸曰降

之志而浣旣辱之身乎予曰君志何降而身何辱也自以爲降且辱正蘧伯玉知非之心可與言學矣毛義於親在捧檄而喜親沒遂不復出吳草廬非宋孝廉乎今之仕者孰爲草廬而不仕者孰勝草廬也君之出也不違親以立名不出也不違道以干進志何降而身何辱焉乾行躍然起再拜稽首曰先生命我矣因相約結茅蘇門攜其二子爲投老之計不意歸而病病而死予固傷其志之未遂也君先世新安之涑城村六世祖立陝西參政再傳循禮爲單縣臨潁兩邑令以清廉著再傳

世爵爲長清尉有廉能聲俱載邑乘子桂生員早逝配
劉矢志栢舟撫三歲孤洪譽邑諸生卽君父懷秋公也
子二爾嘉爾淑俱食廩餼孫二淳漢著石蓮居詩一卷
君生平磊砢未得致之於君未得効之於親以爲可得
之於師友而今已矣幸爾嘉兄弟能克家也

銘曰質英英文郁郁世述坎意樸肅不違親作明牧罷
民蘇大盜服拯良民綬一幅名已飛身則伏學正勤志
未副淶水肝元氣覆於萬年誌陵谷

鄆城知縣方新王君墓誌銘

吾鄉數百里稱廉孝者曰張君効仁仇君雲慶迄讀新安誌乃知月旦所共推爲夷巷先生雪廬孝子也余因有渥城二老吟繼而渥人士嘖嘖稱有亦孝亦廉而更有猷有爲則鄆城君方新是也各指其事歷歷余心竊敬慕之會其子茂才之徵介仇生憲稷狀來乞志墓之文余病困不嫻于詞遙謝者久之之徵長跪而請曰先子清貧自守齋志而沒慕先生久且殷微先生言非先子意并非予小子意也遂不容辭按狀君諱家祚字厚存方新其號先世小興州自永樂間徙新安數傳爲崑

嘉靖丁酉貢士崑生舜志邑庠生舜志生儉校尉是爲
君父儉生三子君其季也儉兄位乏嗣以君繼之甫五
歲父與生父俱逝母魏生母白熒熒無依晝夜號哭鄰
人爲之泣下君七歲八小學奉二母訓戒發憤下帷以
第一人補弟子員蚤食廩餼性豪舉愛飲善歌博亦不
廢然不至妨業精數禮及門者數人學日勤而德日進
卽貧不能自給未嘗有求於人雖不能承奉顯貴而處
鄉卑牧心無城府人甚重之萬歷癸酉登賢書出黃贊
伯襄之門閭中以君卷擬元以次藝觸時忌亡之時贊

伯主選事欲借君一言不可得嘗以書慰問嘉其狷介
君素于宗族鄉黨無間言至是益自謙厚衣布素食脫
粟淡如也遇父執則以伯叔禮事之偶及祖父泣然泣
下爲詢其語言行事宛宛如生存焉此之殞心於風木
者何如也長兄家俊病篤煎藥進食沒則稱貸以襄葬
事丙子敵薄城下君守西面引水設備城得無恙戊寅
復守西城率二子之徵之問躬冒矢石殲賊無數凡城
外鋒鏑凍餒死傷遍野君捐資瘞之巡方使者以城功
聞倭旨紀錄辛巳偶入都稽勲郎葛君含馨一見而異

之曰吾鄉正多事安得此人而了此耶遂單題授鄆城
令時值李青山之亂數百里鋒火絡繹中路梗塞率仲
子之問幕客二家童三赴鄆途遇二壯士披堅執銳馬
上以手加額者三願爲前驅君坦然不疑隆禮推誠所
經蓬蒿荒草及村落林陸中皆青山餘黨二壯士舉手
指揮賊衆悉爲投戈以額塌地二壯士力也抵鄆四境
荒殘僅餘孤城君亟招撫流亡詢父老利弊竭力興除
釐奸旌善閭邑感悅適恤刑將至君預爲審確凡情可
矜憐益寬莫控者開豁數十人民願解網壬午正月隨

克西道李君赴戴家廟剿賊設險出奇盡出君策遂得
邊平後李有以不法事誣鄆諸生某者君力爲爭且詳
申各上官代爲昭雪郡守諄諄以征課爲急君據鄆邑
殘傷痛哭流涕以告榜示停征復申詳蠲免葺政兩月
卓績多端時流寇告急奉檄防守河平肅役早行晚宿
曹邑禪寺忽以積勞中痰友人遣醫啖以丸藥三日後
始甦長子之徵至急告歸旋里無幾署撫王君猶堅意
促理鄆事扶病復至鄆激切懇辭始得允明月一曩圖
書數卷紳士父老涕淚爲別抵家奉母課兒雍雍色笑

雖四壁蕭蕭而室內無交謫之言坐中有同心之友一
意以藥餌爲事甲申三月神京告變君哀痛幾死嗣後
遂不服藥每語人曰至尊尙爾如是沉病困餘生乎乙
酉正月疾作不起享年四十有九仇生稱君倜儻不羈
峙立之間氣象雄赳時而怒如雷吼稍轉卽霽音宏笑
謔尤喜恢諧所謂頰上三毛也君曾過予敝廬又一再
晤于友人坐上交雖未深已領其概君沒二年始登其
堂蕭條數椽風雨不蔽然格言滿壁丰標可想獨惜其
志大而權輕才長而運蹇倘當重任而秉國成守新守

鄆寧令逆賊肆志耶某日附葬於城西公堤村東嗣父之側

銘曰未及事父猶幸從兄聞語增慟襄葬鍾情無愧於父與兄也兩月作令一民勿虐神京告變誓不服藥無愧於君與民也師門要津請託念絕友人特疏奏績心切無愧於師與友也惟不作於人不愧於天靈爽應在後而在前徘徊夷猶于西郭公堤之阡

孝廉頤菴李君墓誌銘

大興李滋旣葬其父於滄州之華嚴淺踰年乃具狀東

帛乞誌墓之文於其父之友容城孫奇逢曰痛唯我先
君患難困窮而獨好學謹身約已而奇於數卓然自命
之意信于已也堅而見于世也晦承前啟後之志造于
心也苦而著于事也微此不孝所日夜飲痛于心者夫
何能達之于言焉且人子之狀其親也一有不似便是
他人不孝又慄慄焉懼其不似也千世而下使先德不
至露零草莽一一得其實而無溢言焉其惟先生嗚呼
子忍不銘乃受其狀返其帛哭又三月始追思其概而
書之君爲兒童時氣奔放不受約束家故貧性好弄軒

輕不拘每狎侮其曹類父泰徵公憂之困於樓頭者累
日夜不得出君乃玩其樓所藏書漸爲文有奇思泰徵
公初不信繼而異之授以經史左國秦漢諸大家文君
受讀皆能領略遂不復戲二十爲諸生卽有聲當是時
都下有二李子以文名大噪於人君與之頡頏時人號
曰三李泰徵公性孤簡不事生產家漸落君爲邑子弟
授句讀致酒肉爲養供賓客自甘粗糲恬如也兄實任
善病不喜飲藥君日夜思得其病源致藥餌勸進之竟
得瘥君事親孝事兄弟多類此楊機部廷麟文章氣誼

重海內君與一時知名士八人從之遊折衷疑義卽爲
制義文每一題必苦心極慮思路俱盡機部酷愛之曰
沈雄幽折唐之子厚也刻其文曰正告自是其文日益
工而自命益不苟自命不苟而求合益難及門子往往
有通顯者君獨坎壈不偶纍然困於有司然未嘗以此
墮其氣每遊西山酒酣起舞悲歌淋漓慨焉有天下之
志居潞河汎荷花水上分曹賦詩扣舷而歌一時才人
貴客皆辟易莫敢近故時流亦多妒而恨焉甲申寇陷
京師師友零落秦徵公授潞城令君攜家以隨未幾徙

蘇州同知復從之南下泰微公卒於官君以先壙爲牧
馬之墟矣乃迎柩至滄州舊里卜吉葬之雞骨如柴且
囊空如洗母兄又相繼歿貧不能具葬焦勞危苦走數
千里外貨所知始襄其事聞蘇門源泉可以退而棲也
復攜家人焉無何妻父沒終身不娶丁酉舉順天京兆
榜明年下第游廬山日有記至漢江登黃鶴樓猶操筆
爲詩未成而卒得年五十二君於書無不讀對其面如
無所有叩其中愈叩而愈不得竭嘗潛心性理諸書手
鈔成帙好讀易有得卽爲文發之先子來蘇門予輯諸

儒傳宗錄時借商訂嘗謂予曰人當啟手足之際得不
流連牀褥無病而逝便是快事黃鶴樓之仙遊倘亦有
得於機先而早見者耶君困頓文壇者三十年而氣愈
銳志愈堅蓋其得力於學者深故不託於酒癖於禪且
不爲嗣宗之狂長康之癡乃所稱終始於道者與按狀
君諱經國號彝卿後改名易號頤菴先世河間滄州人
自曾大父以軍籍入京師遂爲大興縣人再傳生潔潏
潔潏生碩卽泰徵公也以明經仕至蘇州府同知子二
長卽滋次澤孫一著詩文若干卷藏于家

銘曰古誼積靡君欲振之疊疊文心前驅秉磨靡遠弗
致靡堅弗摧援枹奮鼓和者其誰玉樓修文鬼愛其奇
間人黯黯千古所悲

光祿寺少卿二酉張公暨元配趙宜人合葬墓

誌銘

崇禎十七年三月十九日逆賊李自成陷京師保定張
公羅彥以光祿少卿家居同兄觀政進士羅俊率合郡
官紳士民倡義死守越六日保定陷公死之兄弟子姪
暨婦女一時殉難者二十有三人詳公第羅詰闔門殉

難錄中後二十餘年丁未公元配趙宜人卽世又二年
已酉公冢孫秉曜乃寓書函幣介魏子一鰲鹿子洗心
乞言以銘墓石噫公大義昭天壤炳日星又何借草野
耄廢之言獨是逆闕以賊逼帝創從前未有之變局神
京旣陷保定抗守留千古不易之綱常流連痛恨有不
能自己者先是自成陷全陝文武守土者皆望風逃遁
或紳士爭爲亂首相與稱仁誦義降附之恐後公每痛
心切齒欲以死殉至甲申春太原甯武陷自成入居庸
其黨劉宗亮等略畿南諸郡期北會犯都城中外震驚

無人敢言拒賊者公與觀政公計曰保定爲神京捍衛
不可不守巡邏之事豈異人任乎況郡守未至我等不
任其責奈天子何於是約同署印同知邵公宗元糾閤
郡官紳士民北望拜闕歆盟於北城之上激以忠義捐
以私橐人咸感憤先墮兩門示必死守二月真定兵叛
殺撫臣迎賊賊僞牌數至惟誓死守之嗣新任知府何
公復總監方正化亦至未幾李建泰以閣部統禁兵遇
賊退入保定實以城爲贅而人不知也賊進攻公奮力
拒擊賊敗卻三月復轉攻建泰沮鄉兵燃炮者邵以死

爭不能得賊屢至城下叱張吏部名大罵復射書勸降
傳都城已陷公慟曰吾誓不與賊俱生矣倘能保此一
郡猶可待四方之共誅逆賊者賊攻西北益急砲矢如
雨公身當其衝盡傾家貲以犒士莫不感激爭死賊勢
小却賊首劉宗亮乃自殺其僞將數人尅期克城建泰
中軍郭中杰李勇復爲內應乘火倡亂賊遂入公急歸
取鏡書面上一忠字題壁曰光祿寺少卿張羅彥義不
受辱繼死并亭越三日無敢殮者三大護屍賊見之凜
凜不敢逼視有一犬噬蹠足賊絕其拇賊錯愕惜藁葬

之又三十五日賊敗旣遁家人始啟具棺殮面色猶如
生云公諱羅彥字仲美號二酉先世小興州人明文皇
帝內徙始祖仲禮隸保定之清苑二傳至綱景帝北狩
以書生請纓有功封戶侯爵不受又三傳四教郡庠生
生純臣由武進士官驃騎將軍前軍都督府僉事是爲
公父生六子長羅俊崇禎癸未進士卽觀政公端毅有
清節同殉難公其仲也公爲人爽朗孤峻恥濫交無文
章友喜談論善譴說天下事隨意出之輒條理而文卽
譴語必中肯綮天啓辛酉舉於鄉崇禎戊辰第進士授

行人冊封襄藩歷陞吏部稽勲考功文選主選事有直
聲時徑途猥雜銓法大壞公疏通裁剔事無遺滯待羣
吏嚴明無敢欺誦選人稱慶武陵在政府借起用邊材
引置壬人公力駁正人皆憚之公姻某者資俸應出守
餽貂裘兼金求善地公峻却之時厥衛緝伺益密邏卒
布滿公庭銓司屢下獄抵罪時人目爲火葬公獨厲廉
能竟無纖瑕可中陞光祿少卿上郊祀公贊禪獻先主
選時庚辰進士謁選有直奔堂上奪籤筒自擇者公糾
劾有詔重處其同榜臺省銜之會京察降公一級調外

用里居奉母盡懼凡事必資其兄之命友愛諸弟無纖
微憾勇於任事禍福利害不能惑亦不怵也遇有司苛
政必面折庭爭力爲窮民請命有爲僧營寺觀置地窟
遼道作厯數公著說遷之保定知府方一藻以守城稱
首功遇媒孽將至獲罪同鄉御史史堃主之公憤甚率
百姓擊登聞鼓上書訟其寃由是與堃不合後成德劾
溫體仁史堃詞連同鄉獨不及公蓋信之有素耳先是
十五六年間以城守功詔賜敘資戒嚴時給事中時敏
奉勅至夜半呼門公不啓敏怒劾公擅司城鑰公引郅

惇事辯之詔勿問公故將家子少從都督公居塞上習
於戎事常出與諸將分曹較射故林居數遇城守嫻習
其事人皆樂附而爲之用公之生平所以與城爲終始
也謂非天之屬意於公平公之生距殉義時年四十有
八元配趙封宜人端莊慈敏不苟言笑孝舅姑和妯娌
公性剛而慈惡嚴宜人濟以和順偶怒不釋至長跽以
請必得霽乃已都督公卒於官家遂落公兄弟六人皆
暗學不事生產宜人以勤儉佐之迄公舉於鄉宜人以
母老家貧勸之學語次涕零公輒肅起以謝成進士歷

銓曹卿貳所至皆寓相濟意教子慈不廢勞御膳妾嚴
不廢情門以內讒譖不行職事不相擾雍雍如也光祿
公罷官歸宜人謂曰直道不容今如此猶幸矣當公屢
倡城守時宜人輒出冠帔簪珥犒士曰此朝廷所賜當
爲朝廷用之甲申倡守宜人率諸婦女於後園井亭誓
死以待時秉曜尙幼託老嫗攜匿之城陷公就縊題壁
有妻趙氏妾宋氏錢氏俱投井死之語宜人請曰妾忝
誥封願與君同縊乃結雙纒於梁請先引纒以鳴志纒
絕傷股墮二齒及少甦公氣已絕矣匍匐至井知兩妾

子婦悉歸正命復躍入逾一晝夜不沈詰旦家人聞井中有聲乃宜人也出之復索刀欲自剄家人勸之不得復以首倒擲井中旋浮於水上兩手持磚強以水押滿口中又不死如是者更兩晝夜時有安定字至井亭見之泣下曰光祿公闔門俱死宜人縋不能死井不能死者此天欲以孤付宜人也倘必死五歲孤焉能存乎宜人乃挽索出井匿草屋中賊黨大索張氏子姓敢匿者死舊僕掖宜人出城密探秉耀存亡數日尋至同亡入山中賊遁復故居啟諸屍棺殮悉一身拮据諸昆弟孤

幼婚嫁之需宜人猶量力以給躬勤績紡不替至撫秉
驪成立唯以修身立行無墮祖父之志爲期勉嗚乎宜
人可謂爲其難矣卒年六十有八子晉增廣生城陷投
街井死娶師氏先死於園井孫男一卽秉曜曾孫二衣
子嗚呼人臣死君難天地之大義也而公以林居不假
一兵一餉能以危城抗兇鋒於國勢旣去之後且肘腋
背主奸人督重師而欲賣孤城尙能以六日繫九鼎之
重闔門慷慨臣死忠子死孝婦死節純忠大義豈可與
罪命一朝者同日語耶宜人雖不得同殉而幾死不得

卒能保其孤以有成秉曜承忠孝之裔當艱貞之會定
有以自命矣衰筆敘其事復系以銘

銘曰達人乘時蠖屈期伸乃反經濟節義蒙屯咄咄若
天之艱其遇實則生氣迎其辰愴懷往事痛念甲申經
過上谷憶光祿而沾巾普天同仇胡皆誦義而稱仁高
牙大纛承簡命豎降旗競望先塵公林居倡大義兄弟
父子若一人大厦頽兮支一木六日存兮繫千鈞面彼
常山兮再見真果媲美睢陽兮不獨一巡寒逆膽褫奸
魄騎箕尾馭髯鱗皎皎屋梁明月巍巍高冢秋旻猗宜

人之懿範惟刑于之以身矢百死而不易圖黍稷之明
禋告彼山谷兮安宅是窕勵彼頑鄙兮碧血常新嗚呼
是有明鼎革倡義殉節之臣

夏峰集卷九

史致昌謹校